

दिनांक 28.02.2025

समय: 18.45 बजे

आकाशवाणी जयपुर-अजमेर
प्रादेशिक समाचार

- केन्द्रीय स्वास्थ्य मंत्री जेपी नड्डा कह्यो—ई साल रा आखिर ताई देश मांय टी.बी. री बीमारी खत्म करण सारु सगळा ज़रूरी जतन कर्या जा रह्या है।
- जयपुर मांय काल राज्य स्तर रो आरोग्य मेळो सुरु व्हेला—स्वस्थ जीवन शैली रा बारा मांय जाग जगायी जावेला।
- प्रदेश री सरकारी स्कूलां मांय काल मेगा पीटीएम—शिक्षामंत्री मदन दिलावर सगळा मायतां ऊं शिरकत करण री अपील कीनी।
- राज्य मांय आखा तीज अर पीपल पूण्यू रे मौके बाळक जोड़ां रा ब्याह री शंका ने ध्यान राखता थकां सगळा जिलां मांय कन्ट्रोल रूम बनाव रा हुकम।
- प्रदेश मांय केई ठोड़ां हल्की बिरखा—कठे—कठे ज़ोरदार बायरो बाज्यो।

000

देश मांय ई साल रा आखिर ताई टी.बी. री बीमारी ने खत्म करण सारु सगळा ज़रूरी जतन कर्या जा रह्या है। केन्द्रीय स्वास्थ्य अर परिवार कल्याण मंत्री जे.पी. नड्डा आज पुरी मांय **भारत में सार्वजनिक स्वास्थ्य देखभाल प्रणाली में अच्छी, अनुकरणीय प्रथाएं और नवाचार** मुद्दा माथे राख्यी ज्या 9वां राष्ट्रीय शिखर सम्मेलन रा उद्घाटन सत्र मांय आ जाणकारी दीनी। वे कह्यो के भारत मांय टाबरां अर मायड़ां री मौत री रेट मांय दुनिया री रेट ऊं दूणी कमी आयी है। श्री नड्डा कह्यो के मलेरिया री बीमारी माथे ही काफी हद ताई काबू कर लियो ज्यो है। वे कह्यो के सरकार नुवी स्वास्थ्य नीति रा तहत चिकित्सा तंत्र मांय केई सुधार कीना है।

.....

000

केन्द्र सरकार री ओर ऊं देश मांय काल **सातवां जन औषधि सप्ताह** सुरु व्हेला। ई सप्ताह रे दौरान **फार्मास्युटिकल एंड मेडिकल डिवाइसेज ब्यूरो ऑफ इंडिया** री ओर ऊं न्यारा—न्यारा कार्यक्रम राख्या जावेला। पी.एम.बी.आई. रा नोडल अधिकारी शुभम भार्गव बतायो के काल जोधपुर मांय पैदल रैली ऊं जन औषधि सप्ताह री सुरुआत करी जावेला। कुचामन सिटी मांय ई बस स्टेण्ड ऊं सरकारी अस्पताल ताई रैली निकाली जावेला। 2 मार्च ने भगत की कोठी रेलवे स्टेशन रा जन औषधि केंद्र माथे मुफ्त स्वास्थ्य जांच शिविर लगायो जावेला। जोधपुर शहर मांय हेरिटेज वॉक ई राख्यी जावेला। 3 मार्च ने जन औषधि बाल मित्र अर 4 मार्च ने शहर मांय मातृ शक्ति सम्मान अर पाँच मार्च ने एक गैर—सरकारी कॉलेज मांय प्रबुद्ध जन री सेमिनार राख्यी जावेला। हर साल एक ऊं सात मार्च ताई जन औषधि सप्ताह मनायो जावे है।

000

राज्य स्तर रो आरोग्य मेळो आरोग्यम—2025 काल जयपुर रा जवाहर कला केंद्र मांय सुरु व्हेला। 4 मार्च ताई चालण वाळा ई मेळा मांय आयुर्वेद, होम्योपैथी, यूनानी, योग और नेचुरोपैथी तरीकां ऊं बीमारियां रा ईलाज सारु राय दी जावेला। उपमुख्यमंत्री अर आयुष मंत्री डॉ. प्रेम चंद बैरवा आज खबरनवीसां ने आ जाणकारी दीनी। वे कह्यो के मेळा रे मार्फत लोगां ने ईलाज रा आयुष तरीकां रा असर अर स्वस्थ जीवनशैली रा बारा मांय जाणकारी दी जावेला।

श्री बैरवा बतायो के ई दौरान ईलाज रा भांत-भांत रा तरीकां रा दरसाव सागे रोजीना योगाभ्यास ई करवायो जावेला।

.....

आयुष मंत्री खबरनवीसां ने महकमा रा लारला एक साल रा कामां अर उपलब्धियां री जाणकारी ई दीनी। वे कह्यो के महकमा मांय मोटी तादाद मांय भर्तियां करी जा रही है। श्री बैरवा बतायो के राइजिंग राजस्थान रा तैत आयुष विभाग मांय निवेश रा ई केई प्रस्ताव मिल्या है, ज्यां माथे काम कर्यो जा रह्यो है।

000

जयपुर मांय तीन मार्च ऊं व्हेवण वाळा एशिया-प्रशांत हलका रा श्री आर अर सर्कुलर इकोनॉमी फोरम री तैयारियां ने आखिरी रूप दियो जा रह्यो है। राजस्थान इंटरनेशनल सेंटर मांय व्हेवण वाळा तीन दिन रा ई आयोजन मांय न्यारा-न्यारा देशां रा नेता अर जाणकार लगातार विकास अर कार्बन तटस्थता री दिशा मांय सर्कुलर सोसायटी ने आकार देवण रा बारा मांय चर्चा करेला। इण रो मकसद एशिया अर प्रशांत हलका मांय श्री आर यानि रिड्यूज़, रियूज़ अर रिसाइकल ने बधावो देवणो है। ई फोरम रा इंडिया पेवेलियन मांय देश रा खास मंत्रालयां अर राष्ट्रीय मिशनां री उपलब्धियां रो दरसाव कर्यो जावेला।

000

राजस्थान अध्यापक पात्रता परीक्षा-रीट 2024 आज शांति सागे पूरी व्हे गयी। रीट परीक्षा रा दूजा दिन आज एक ही पारी मांय परीक्षा व्ही, जदके काल परीक्षा दो पारियां मांय लीरीजी ही। जालौर मांय पुलिस रीट परीक्षा मांय नकल करावण रा आरोप मांय दो जणां ने गिरफ्तार कर लीना। पुलिस रे मुजब आरोपितां रा कब्जा ऊं एक लाख रुपया री नकदी अर चार मोबाइल फोन बरामद करी ज्या। आं रे खिलाफ मामलो दर्ज कर र जांच करी जा रही है।

000

.....

000

प्रदेश री सरकारी स्कूलां मांय काल संवारे 11 बज्यां विद्यार्थियां रा मायतां अर अध्यापकां री मीटिंग राखी जावेला। शिक्षामंत्री मदन दिलावर बच्चां रा मायतां ऊं स्कूल पूग र पीटीएम मांय शिरकत करण अर बच्चां री शैक्षणिक प्रगति मांय भूमिका निभावण री अपील कीनी है। शिक्षा विभाग रा सचिव कृष्ण कुणाल शिक्षकां अर मायतां ऊं बच्चां रा भला सारु पीटीएम मांय जावण री अपील कीनी। पीटीएम मांय खास तौर ऊं तीसरी ऊं आठवीं ताई रा बच्चां ने कक्षा स्तर ताई लावण सारु 21 अर 22 जनवरी ने राखी ज्या दक्षता आधारित आकलन-3 रा छप्पोड़ा रिजल्ट दे र बच्चां री प्रगति रा बारा मांय मायतां सागे चर्चा करी जावेला। पीटीएम मांय मायतां सागे अपार आई बणावण रा बारा मांय ई चर्चा करी जावेला। साथ ही बच्चां रा स्वास्थ्य री जाणकारी ई दी जावेला।

000

राज्य मांय बाळक जोड़ां रा ब्याह री रोकथाम सारु जिला कलेक्टरां, एस.पी. अर पुलिस उपायुक्तां ने खास चौकी राखण बाबत् हुकम दिया ज्या है। गृह विभाग रा अतिरिक्त मुख्य सचिव आनन्द कुमार आखा तीज अर पीपल पुण्यू रे मौके बाळक जोड़ां रा ब्याह री शंका ने ध्यान राखता थकां ई बारा मांय अहलकारां ने कागद लिख्यो है। वे बाळक जोड़ां रा ब्याह रोकण सारु न्यारा-न्यारा महकमां रा अहलकारां अर कर्मचारियां ने जनता मांय जाग जगावण अर वां ने रोकण सारु जरूरी कार्रवाई करण बाबत् कह्यो। श्री आनन्द कुमार बाल विवाह रा नुकसाण रा बारा मांय स्कूलां मांय ई प्रचार-प्रसार करण र हुकम दीना। आखा तीज रा अबूझ सावा माथे जिला अर उपखंड स्तर रा दपतरां मांय 24 ई घंटा काम करण वाळा कन्ट्रोल रुम बणाया जावेला। गृह विभाग रा अतिरिक्त मुख्य सचिव बतायो के बाळक जोड़ां रा ब्याह री कॉल सेंटर नम्बर 1 8 1 अर पुलिस कन्ट्रोल रुम

रा 100 नम्बर माथे ई शिकायत दर्ज करायी जा सके है। वे बतायो के ब्याह री कंकु-पत्रियां मांय बींद-बींदणी री उम्र रा कागजात प्रिंटिंग प्रेस माथे ई राख्या जावणा जरूरी है।

000

राष्ट्रीय विज्ञान दिवस रे मौके आज प्रदेश मांय केई कार्यक्रम राख्यी ज्या। जोधपुर रा केन्द्रीय शुष्क क्षेत्र अनुसंधान संस्थान-काजरी मांय राख्यी ज्या कार्यक्रम मांय संस्थान रा निदेशक डॉ. ओ. पी. यादव अर विशेषज्ञ डॉ. प्रियव्रत सांतरा, "कृषि भूमि में जल और ऊर्जा सुरक्षा" मुद्दा माथे जाणकारी दीनी। कार्यक्रम मांय पाणी बचावण री न्यारी-न्यारी तकनीकां अर उपज मांय बधोतरी रा तरीकां रा बारा मांय ई जाणकारी दीरीजी। इण ई सिलसिला मांय राजस्थान केन्द्रीय विश्वविद्यालय मांय राख्यी ज्या जळसा मांय विज्ञान प्रदर्शनी लगायी ज्यी, जिण मांय विद्यार्थी केई तरह रा मॉडल रो दरसाव कीनो। चित्तौडगढ री सैनिक स्कूल मांय ई विज्ञान प्रदर्शनी लगायी ज्यी। सवाईमाधोपुर मांय मांय विज्ञान दिवस रे मौके स्कूल-कॉलेजां मांय न्यारी-न्यारी होडां राख्यी ज्यी।

000

सप्त शक्ति कमान री ओर ऊं जयपुर रा फौजी अस्पताल मांय लगायी ज्यो मेगा मोतियाबिंद सर्जरी शिविर आज पूरो व्ह्यो। पांच दिन रा ई शिविर मांय पैली वाळा फौजियां अर वां रा पिरवार वाळा 300 ऊं बत्ता लोगां रा मोतियाबिंद रा ऑपरेशन करी ज्या अर आंख्यां री जांच कर र मुफ्त दवाइयां दीरीजी। समापन कार्यक्रम मांय उद्योग मंत्री कर्नल राज्यवर्धन सिंह राठौड़ अर सप्त शक्ति कमान रा आर्मी कमांडर लेफ्टिनेंट जनरल मनजिंदर सिंह ई मौजूद रह्या। ई मौके कर्नल राठौड़ फौज री ई पहल री सराहवणा कीनी। वे कह्यो के पैली वाळा फौजियां अर वां रा पिरवार वाळां री आंख्यां री मुफ्त जांच रो शिविर सामुदायिक कल्याण रा प्रति फौज री प्रतिबद्धता बतावे है।

000

प्रदेश रा उतराद-आतूणी हलकां मांय छांटो-छिड़को अर हल्की बारिश व्हेवण रे कारण दिन री बगत पारो तीन से चार डिग्री सेल्सियस ताई उतर्यो है। हनुमानगढ मांय आखा दिन बादळा मंड्या रह्या अर हल्की बारिश व्ही। चूरू जिला मांय केई ठोड़ां व्ही बिरखा ऊं साखां ने नुकसाण री शंका है। राज्य रा केई हलकां मांय आज बादळा मंड्या रह्या। राजधानी जयपुर मांय बादळा मंड्या रेहवण ऊं दिन मांय ई हल्की ठंड रो अहसास व्ह्यो। सवाईमाधोपुर अर बाड़मेर समेत केई जिलां मांय ई बादळा मंड्या रह्या। मौसम विभाग आज बीकानेर, जोधपुर, जयपुर अर भरतपुर संभाग मांय कटे-कटे बादळां री गाज सागे हल्की बिरखा व्हेवण अर औचक ई तेज बायरो बाजण रा आसार जताया है। विभाग रे मुजब काल ई जयपुर अर भरतपुर संभाग अर शेखावाटी हलका मांय कटे-कटे बादळां री गाज सागे हल्की बारिश री संभावना है। विभाग रे मुजब 2 मार्च ऊं कम-ती-कम तापमान 2 ऊं 4 डिग्री सेल्सियस ताई उतरण जद के ऊंचा-ऊं-ऊंचा तापमान मांय 2 ऊं 3 डिग्री सेल्सिय री बधोतरी री संभावना है।

000